

FFW Sugenheim
Kerwa 2006

Fiese Taktik

Wie fast jeds Jahr is es gor net schwer,
a Gschicht zu finden über unner Feuerwehr.
Der sympathische Verein
muss a des Jahr Teil der Predigt sein.
Zuerst muss mer wissn,
dass die Feuerwehleit Mitglieder vermissn.
Do drüber tun se recht arch fluchn
und dann überall nach neue Leitle suchn.
Des is ja an sich gor net schlimm,
grad weil mittlerweile a Ortsboschn beitretn sin.
Bloß unner Lieblingsverein hat si etz a Taktik ausdacht,
die hat uns ganz schee stutzich gmacht.
Auf jeder Feier bei uns in Sunga
wird erschtmol gessn, trunkn und gsunga,
doch dann zu vorgerückter Zeit,
machen sich die Überredungskünstler vo der Feuerwehr bereit.
Die Boschn bringa dann die Verträch zum unterschreim,
abber die Leit sin so buffn und merksn gor net, dann sins scho drin
im Verein.
So findet mancher der zu spät Land gewinnt,
am nächstn Morgn im Feuerwehhaus sein Noma aufm Spind.
Dass mer uns net falsch verstehn,
mit eich kann der Jugendclub wunderbor unter am Dach zam lem.
Aber eins is für mich wie euer Zwetschger so klar,
wer a echter Feuerwehmann wern will, unterschreibt nüchtern a.



Ente gut, alles gut!

Dass die Medien öfters mol a Szene machn,
wecher gor net ganz so wilde Sachn,
des is eigentlich ganz weit bekannt,
sogar bei uns im Frankenland.
Die Vogelpest gibts scho seit mehr wie hundert Jahr,
abber heuer hats ka Zeitung gem, die net voll vo dem Gschmarri wor.
A an Sunga kummt so was net vorbei
und alle ham drüber gredt - es wor a mords Gschrei.
A älterer Mou - im Schloss kümmert er si um die Rosn und Blumma,
hat si die Sach a recht zu Herz gnumma.
Er hat auf am Spaziergang am Booch a tote Entn endeckt,
für ihn wors klor, die is an der Vogelgrippe verreckt.
Schnell verbreiten tut se si, hat er glessn, saugfährlich is die
Krankheit,
alarmiert hat er den Bürgermaster und die Feuerwehr und am
Tatort worn ratz fatz an haufn Leid.
Unner liebe Feuerwehr is dann also ougschlappt kumma
und hat si des Fundstück amol vorgnumma.
A Minutn später ham alle glacht und worn dortn gstandn wie
die Dappn,
weil die gfährliche Entn wor bloß a Attrappn.



So, und des geht etz an alle vo euch,
nehmts net so ernst des ganze Zeitungszeuch.
Es wird nix so haas gessn wies kocht werd liebe Leid,
die nächste Hiobsbotschaft kummt bestimmt - vielleicht scho heid.



Text aus der Kerwa-Predigt

